

國粹叢書第三集

燼

餘

錄

國學保存會印行

燼餘錄二卷城北遺民徐大焯撰予從金陵徐紹齋所藏冊頁錄副甲編紀
宋初宋末事乙編紀吳中事半從先世筆記中錄出足以徵信藏篋有年冀
備脩志之用豈料投忌尙須秘藏我子孫其珍秘之大焯吳縣人元初居桃
陽慶雲里卽今官庫巷辛卯秋日李模記



刊
行

燼餘錄甲編

城北遺民述

順德鄧 實校錄

先朝上承五季下平十國公私紀載浩如煙海汴京旣陷官書皆入北方兀
尤南牧幾於焚坑一二遺老掇拾舊聞罔顧忌諱紹興中葉遂禁私史著爲
令國初著錄亦在所禁中歷高光寧理四朝搜毀七次

昭憲杜太后實生五子長廷濟五廷贊皆早世太后遺命太祖傳弟太宗太
宗傳弟廷美傳姪德昭遞及廷美之子洎太祖崩宋后涕泣語太宗母子之
命懸陛下手太宗誓同富貴興國四年德昭從征契丹值太宗潰走敗軍無
主暫曾推戴班師後有譖言者德昭憂懼自裁弟德芳明年亦薨又明年廷
美罷開封尹留守西京逾月罷歸第又逾月降封涪陵縣公安置房州逾二
年甲申以抑鬱死年三十八旣薨太宗諭廷臣曰朕乳母耿氏實生二子長
曰趙廷俊次卽廷美非皇考子太祖皇后宋氏於至道元年四月薨不以后

禮喪八月遂立真宗爲太子

模按太宗處昆弟間實有涼德正史所載略同

周世宗觀象厚載門外五丈原見有若火輪小兒者上升天際卽知火德將王未幾崩雖立恭帝諸將別推太祖遂自陳橋返蹕太宗前驅入城令恭帝與母妃劉氏出止天清寺太祖旋入宮后妃迎拜遂封小符后爲周太后遷西宮淳化四年崩又封恭帝爲鄭王安置房州開寶六年薨恭帝弟曹王熙讓小符后第六妹出紀王熙謹楊貴妃出並歸太宗邸斬王熙誨陸妃出並賜潘美熙讓後隨太宗征契丹流落虜中卽郭藥師家始祖熙謹於乾德二年卒郭藥師始祖語見藥師傳金人王著撰

史闕
模按世宗諸子踪迹曾見他書此條更詳確五代史本有曲筆得此可補

太祖乾德元年癸亥七月俘湖南國主周保權至京授右千牛衛上將軍太

宗立後十年卒年三十四

太祖乾德元年八月漳泉國主陳洪進降太宗興國三年歸朝授太師節度從征太原封岐國公越九年卒年七十二

太祖乾德元年十月荆南國主高繼冲歸朝授節度使越十四年卒年三十一

太祖乾德三年五月十六日蜀主孟昶歸朝授太師中書令封秦國公越二十日卒年四十七

太祖開寶四年俘南漢國主劉鋹至京御門受俘牽羊獻廟畢赦爲太保右千牛衛上將軍封恩赦侯太宗立後五年卒年三十九

太祖開寶九年正月俘江南主李煜至京牽羊受朝畢赦爲太傅右千牛衛上將軍封違命侯太宗立後二年七月七日煜誕辰賜宴其第遂卒年四十二太祖開寶九年二月吳越國主錢俶來朝四月令歸國太宗興國三年復來

朝留不遣從征太原封南陽郡王越十年八月二十四日倣誕賜宴其第遂卒年六十

太宗興國四年親征太原北漢國主劉繼元降赦爲太師右衛上將軍節度使越十三年卒年三十九並見先始祖所見錄

先祖筆乘錄龔明之野語云李山民有妣名浩者故依清卿侍郎居侍郎隨欽宗蒙塵青城浩亦隨往金人誤爲皇子同禁錮之徽宗知爲侍郎妣竟子之浩能書記北行監護眞珠郎君深契之配以妻妾後隨顯仁歸凡在異域二十年著有普天同憤錄亦名皇族被擄記奉敕禁毀浩仍留副後人不秘幾成大獄時浩已死山民爲其後人設策得免於難同憤錄凡四卷首卷記兩宮次卷記皇族三卷記敵情四卷記雜聞浩所錄進高廟者僅次三兩卷卽奉敕毀然全書皆有姓名職位時日地址極資考証若刪其繁蕪足備信史

筆乘又云李茂苑所居距予不一里屢相過從人極豪上曾娶遼公主耶律氏已死又娶韓氏卽相國公已聘未娶之夫人尙在五國茂苑得保首領優游物外者皆顯仁太后之賜又云欽宗朱皇后確於建炎二年八月二十四夜投水薨逝斷無疑義惟宗金曆法有無殊異則未可測

模按朱后薨期足補史闕同憤錄云八月二十四夜薨於虜京甲第水池明年治水池得骸骨及金交龍抹胸貫索一條長二尺附骨中玉佩一方鐫變龍鳳金貫簪一只長五寸附髮內皆后常御物原文未詳爲附記之陳搏陝西人隱華山周世宗禮聘之却以詩云草澤我皇詔圖南搏姓陳三峯十年客四海一間人世態從來薄詩情自得真超然居物外何必使爲臣太祖訪諸山中酒酣獲一狐烹之且燔其巢巢有七雄悉殲搏一再堅阻不獲命頓足曰從此長爲君家子孫患數不可挽有如是耶太宗繼立召搏不至以詩獻帝云天道有循環皇圖無終極四海總子元胡分南與北諸說相

傳已久且謂詩皆識語其僞莫可詰辨

吳越王晚年嘗譜小詞云城上風光鶯語亂城下烟波春拍岸綠楊芳草幾時休淚眼愁腸先已斷情懷漸變成衰晚鶯鑒朱顏驚暗換昔年多病厭芳尊今日芳尊惟恐淺似亦未免牢愁暴卒於賜宴之夜且步李煜後塵不能無疑

元豐四年于闐表文云日出東方赫赫大光照見西方五百里國條貫主黑汗王表上日出東方赫赫大光照見四天下條貫主阿舅大官家你前時要者玉自家甚是用心只是難得似你底尺寸自家已令人兩河尋訪纔得似你底便奉上也

太宗既平北漢聖心狂悅親製平晉歌令羣臣歌而和之改行宮爲平晉寺撰文勒石乘勝北征契丹時所得北漢妃嬪皆隨御諸將亦掠北漢婦女充軍妓士氣不揚全軍盡覆於高梁河時興國四年七月也吳越王俶足受數

創始終扈駕越兩日乃得集潰班師俶由是得世其家宋代軍妓亦始此
興國五年太宗莫州之敗賴楊業扈駕得脫險難業太原人世稱楊令公仕
北漢建雄軍節度隨劉繼元降授右衛大將軍代州刺史先自帝出長垣關
敗契丹於關南旋移軍大名進戰莫州遂爲契丹所困楊業及諸子奮死救
駕始得脫歸大名密封褒論賜賚駢蕃七年業敗契丹於雁門豐州獲其節
度蕭太八年收降契丹三年千餘帳遷雲州觀察兼判鄭州代州諸將大忌
之雍熙三年業副潘美北代破宴朔應雲四州會蕭太后領衆十萬犯宴業
請潘美會軍出雁門不應業分死出戰士卒盡喪慨然曰不幸爲權奸所陷
遂死之贈太尉節度使長子淵平隨殉次子延浦三子延訓官供奉四子延
環初名延朗五子延貴並官殿直六子延昭從征朔州功加保州刺史眞宗
時與七子延彬初名延嗣者屢有功並授團練使延昭子宗保官同州觀察
世稱楊家將

紹興二十一年十月高廟幸清河郡王張浚第進奉筵宴目 繡花高飮果
壘八色 香圓 眞柑 石榴 棧子 鷄梨 乳梨榎楂 花木瓜 樂
仙乾果叉袋兒十二色 荔枝 圓眼 香蓮 榧子 榛子 松子 銀
杏 梨肉 棗圓 蓮子肉 林檎旋 大蒸棗 縷金香藥十色 腦子
花兒 甘草花兒 硃砂圓子 木香丁香 水龍腦 史君子 縮砂花
兒 官桂花兒 白朮人參 橄欖花兒 雕花密煎十二色 梅球兒
紅消花 筍 密冬瓜魚 紅團花 木瓜大段 金橘 青梅 荷葉薑
密筍花兒 棧子 木瓜方花兒 砌香酸鹽十二色 香藥木瓜 椒
梅 香藥籐花 櫻桃 紫蘇奈香 菊花柳兒葡萄 甘草花兒 薑絲
梅 梅肉餅兒 水紅薑 雜絲梅餅兒 脯腸十色 肉綾條子 皂角
錠子 雲夢犯兒 鰕腊 嬾房 旋鮓 金山鹽豉 酒醋肉 肉瓜齧
垂手盤子八色 陳蜂兒 番蒲萄 香蓮事件 巴欖子 大金橘

新椰子 小橄欖 榆柑子 再坐進四時果八色 春藕 鵝梨餅子
 甘蔗 乳梨肉兒 切棖子 切綠橘 生藕錠兒 時新果十色 金橘
 楊梅 新羅葛 切靈葷 切脆棖 榆柑子 新椰子 切宜母子
 藕錠子 甘蔗奈香 新柑子 梨五花兒 瓏纏果子十二色 荔枝甘
 露餅 荔枝葵花 荔枝好耶君 瓏纏桃條 酥胡桃 纏棗圈 纏
 梨肉 香蓮事件 香藥葡萄 纏松子 糖霜玉蜂兒 白纏桃條 下
 酒三十味 花炊鶴子 荔枝白腰子 爛房簽 三脆羹 羊舌簽 萌
 芽肚脰 肫掌簽 鶴子羹 肚脰膾 鴛鴦蝶肚 炒沙魚襯湯 鱔血
 炒蟹 鵝肫掌湯齏 螃蟹釀棖 爛房玉蕊羹 鮮蝦蹄膾 南炒鱔
 洗手蟹 鱈魚假蛤蜊 五珍膾 螃蟹清羹 鶴子水晶膾 豬肚假江
 蟠 鰕棖膾 鰕魚湯齏 水母膾 二色蟹兒羹 蛤蜊生 血粉羹
 挿食八色 炙肚脰 炒白腰子 炙鶴子脯 潤雞 潤兔 炙炊餅

鬻骨 勸酒果子庫十番 砌香果子 調花密煎 時新果子 獨裝巴
欖子 鹹酸密煎 裝大金橘小橄欖 獨裝新椰子 四時果四色 對
裝揀松番葡萄 對裝春藕陳公梨 厨勸酒十味 江蟾燂肚 江蟾生
蟾蜍簽 薑醋香螺 香螺燂肚 薑醋假公權 煨牡礪 牡礪燂肚
假公權燂肚 蟻鉅燂肚

宣和七年十月金人入寇徽宗傳位於欽宗靖康元年正月犯京師割地犒
師以和金人退遂留三鎮地弗與十一月復犯京師旋陷二年正月欽宗出
城二月徽宗及后妃嬪御太子諸王帝姬宗室均出城暫留青城金寨三月
杪金人擁之北行十月抵中京明年八月抵上京二十四日朝金主於乾元
殿僞封徽宗爲昏德公欽宗爲重昏侯建炎四年九月二十五日追封欽宗
后朱氏爲靖康郡貞節夫人我朝卽以是日爲朱后忌

嘉定四年二月蒙古伐金五年圍西京蒙古汗中流矢遂罷攻六年七月蒙

古汗分軍兩路盡拔河北郡縣十月合圍中都敗金援軍於城北遣使諭降
七年二月金獻宗女二十童女百金十萬錠銀百萬錠帛二十萬疋請和弗
許三月二十五日金主獻金蓮公主及妃嬪三百人二十六日蒙古汗受降
五月金汗遷汴蒙古兵復圍中都八年五月蒙古汗自將破之俘貞祐后蒲
察氏及宮嬪宗屬百四十人至涼涇遂罷兵紹定三年蒙古汗嗣位自將南
征四年破洛陽河中五年正月蒙古兵渡河遂攻城發金明惠太后陵取其
櫬去三月金遣歸順人家屬及繡女弓匠數千人及曹王楊侍郎爲質請和
並以金帛贖太后櫬蒙古汗遂頒師七月金軍殺蒙古使蒙古兵復南下金
汗奔歸德六年蒙古兵圍汴京速不台駐青城金元帥崔立以梁王荆王仁
聖太后王氏太妃裴滿氏皇后徒單氏及妃嬪有位號者三十七車宗室男
女五百餘人輦送青城四月遣送蒙古汗軍次擁之而北五月抵國都十二
月宋軍蒙古軍合攻金汗於蔡州端平元年正月宋兵破南門金汗自經焚

其尸以殘骨及金參政張天綱完顏好海獻俘於朝

陳橋推戴太祖時兩日摩盪迷眩人目爭取盆水俯視太陽之上復一太陽若相掩映乾德五年五星聯珠於奎垣嗚呼盛哉紹興十二年高宗受北冊曰咨爾宋康王不弔天降喪於爾邦亟瀆齊盟自貽顛覆爾越在江表用勤我師旅蓋十有八年於茲朕用震悼斯民其何罪令天其悔過誕膺爾衷封奏狎至願身列於藩輔今遣光祿大夫左宣徽使劉筈等持節冊命爲帝國號宋世服臣職永爲屏翰嗚呼欽哉其恭聽朕命

宣祖徵時道出杜家莊避雪門外莊丁見狀貌英偉延款飲食久之主人愛其勤謹贅爲第四女婿遂生太祖太宗莊前故有窪名雙龍潭至是始驗靖康元年韓曾指取蔡京家屬京寵姬慕容氏邢氏武氏已南遷取諸中途以畀之京賦詩爲別云爲愛桃花三樹紅年年歲歲惹春風如今去逐他人手誰復尊前念老翁

大觀中詔京城近日有衣裝外裔形製戴氍笠子着戰袍繫番東帶之類開封府宜嚴行禁止

靖康建號楊欽時密語人曰後十二閱月立康非佳讖也先是政和中詔道士僧尼不得稱庵主觀主又依李寬奏禁以聖字爲名依趙野奏禁以君王天字爲名欽時嘗云無主無聖無君無王無天其何能國後皆驗

慶元黨禁 宰執四人趙知愚留正王藺周必大 待制以上十三人朱熹徐誼彭龜年陳傅良薛叔似章穎鄭湜樓鑰林大中黃由黃黼何異孫逢吉 餘官三十一人劉光祖呂祖儉葉適楊芳項安世沈有開曾三彌游仲鴻吳獵李祥楊簡趙汝讜趙汝談陳峴范仲黼汪達孫元卿袁燮陳武田澹黃度詹體仁蔡幼學黃灝周南吳柔勝李璫王厚之孟浩趙鞏白炎震 武臣三人皇甫斌范仲壬張致遠 太學六人楊宏中周端朝張衡林仲麟蔣傳徐範 士子二人蔡元定呂祖泰見世父考亭公札記

天聖中童謠云曹門好好曹門高有高高後英宗卽位高太后實太皇太后曹氏之所自出英宗未誕時濮安懿王夢龍戲日旁與日俱墜承以衣囊條飛入雲作人言云非汝所有 鼎革後宮掖北轅昭儀王清惠題驛壁云太液芙蓉渾不是舊時顏色曾記得承恩雨露玉樓金闕名播蘭簪后妃裏暈潮蓮臉君王側忽一朝鼙鼓揭天來繁華歇龍虎散風雲滅千古恨憑誰說對河山百二淚沾襟血驛館夜驚塵土夢宮車曉碾關山月願嫦娥相顧肯從容隨圓缺好事者妄謂文山過此見詞歎惜謂其肯隨圓缺也肯字本作豈肯解文山必見及此

模按此辨極確未經人道

德祐二年丙子正月二十二日北兵入杭三月二十二日帝及全太后隆國黃夫人朱美人王夫人福王宮眷宗親官屬數千人北狩四月二十七日抵上都五月十一日全太后爲尼於正智寺十二日內官安康郡朱夫人安定

郡陳夫人及兩侍女自縊遺筆云不免辱國幸免辱身不辱父母免辱六親大難既至刼數回輪妾輩同死守於一貞八月太皇太后謝氏北狩此皆彼人所述足稱信史

閻侍郎蒼舒使金感賦念奴嬌一闋疏眉秀日向尊前依舊宣和裝束貴氣盈盈風韻爽舉止知非凡俗皇室宗姬陳王愛女曾嫁貂蟬族干戈流蕩事隨天地翻覆珠淚搵了偷彈勸人飲盡愁怕吹笙竹留落天涯俱是客何必平生相熟舊日繁華如今憔悴付與杯中醪興亡休問爲予且嚼船玉

徐鉉入朝後以貫索星見請曲赦削官銘其齋曰爰有愚叟棲此陋室風雨可蔽庭戶不出知足爲富娛老以佚貂冠蟬冕虎皮羊質處之恬然永終爾吉

史嵩之丁父憂淳祐詔使起復士論大譁揭榜太學齋廊云丞相朝入諸生夕出丞相夕入諸生朝出理宗飲宴過度史彌遠臥病太學生亦揭榜云陰

陽眼爨理天地醉經綸

契丹之先有一男子乘白馬過遼河遇一女子乘灰牛遂與之合生八子迭長其部至今大祀尙用灰牛白馬

淳熙丁未京鐘使汴金人設宴奏樂鐘以國恤請撤爭之不決至令三節人出館金卒從之歸未抵京事已傳聞於上除工部侍郎陳東上書人皆知之朱夢說宣和間上書極諫三事入仕之源太濁不急之務太繁宦寺之職太盛其辭不傳夢說陸州布衣誕徽宗時神宗夢李煜來謁陳太后夢太祖以玉斧擲地大聲語太宗汝願去好好做去太宗三揖受命產欽宗時王皇后夢張仙送子至云與汝天羅星勿再祀我產高宗時韋太后夢吳越王乘輦入宮徽宗亦夢吳越王來朝及見高宗驚曰此眞浙臉

模按夢幻之辭君子不取宋人小說都載及此宋初待錢李二主必有失德爲天理所不容人言卽天心也

太宗屢於上前盛稱花蕊夫人才未匝月蜀主暴卒太祖異之亟召花蕊入宮詢蜀主狀因及亡國事費占二十八字云君王城上豎降旂妾在深宮那得知十四萬人齊解甲更無一箇是男兒悅其敏慧留侍掖庭者十載有盛寵太祖寢疾中夜太宗呼之不應乘間挑費氏太祖覺遽以玉斧斫地皇后太子至太祖氣屬縷太宗惶窘歸邸翌夕太祖崩以下四則並見始祖所見錄引趙普密記

樸按花蕊雖在年逾三十此條可疑或因小周后事衆惡皆歸耶

花蕊過葭萌驛題壁云初離蜀道心將碎離恨綿綿春日如年馬上時聞杜鵑爲世傳誦

李後主雅擅詩詞渡江有作云江南江北舊家鄉三十年來夢一場吳苑宮闈今冷落廣陵臺殿已荒涼雲籠遠岫愁千片雨打孤舟淚萬行兄弟四人三百口不堪回首細思量歸朝後嬪御星散又譜長短句云春花秋月何時

了往事知多少小樓昨夜又東風故國不堪回首月明中雕闌玉砌應猶在
只是朱顏改問君都有幾多愁恰似一江春水向東流又一闋云簾外雨潺
潺春意闌珊羅衾不暖五更寒夢裏不知身是客一晌貪歡獨自莫憑闌無
限關山別時容易見時難流水落花何處也天上人間太宗聞而惡之

江南小周后實昭惠后女弟昭惠病往視疾後主遽幸之昭惠薨因以爲后
歸宋未幾太宗登位月朔必令內朝朝必留侍數日後主有怨言暴卒小后
入宮

謝緒會稽人秉性剛毅以天下自任咸淳辛未兩浙大饑盡散家財賑給之
知宋祚將移搆望雲亭於金龍山祖隴隱居不仕作望雲亭詩云東山渺渺
白雲低丹鳳何時下紫泥翹首夕陽連舊漫看黃菊滿新谿鶴閑庭砌人
稀迹苔護松陰山徑迷野老更疑天路近蒼生猶自望雲霓未幾國亡緒北
向涕泣再拜曰生不報效朝廷安忍苟活卽草一詩云立志平夷尙未酬莫

言心事付東流淪胥天下誰能救一死千年恨莫休湘水不沈忠義氣淮肥
自愧破秦謀苕溪北去通古塞留此丹心滅虜酋吟畢赴水死詩有訛字無
從校正

道君北狩後曾倚聲云玉京曾憶舊繁華萬里帝王家瓊樓玉殿朝喧管
暮列箏琶花城人去今蕭索春夢遶胡沙家山何處忍聽羌笛吹徹梅花又
嘗在五國城題壁云徹夜西風撼破扉蕭條客館一燈微家山回首三千里
日斷天南無雁飛又譜長短句云裁剪冰綃打疊數重冷淡胭脂注新樣靚
粧艷溢香融羞殺蕊珠宮女易得凋零更多少無情風雨愁苦間院落淒涼
幾番春暮憑寄離恨重重這雙燕何曾會人言語天遙地遠萬水千山知他
故宮何處怎不思量除夢裏有時曾去無據和夢也有時不做在韓州日清
明客感云茸母初生認禁烟無家對景倍淒然帝城春色誰爲主遙指鄉關
涕泗漣

道君時朝野詩歌皆成語識御製預借元宵詩云日暎晚霞金世界中卽
事云玉階齊種女貞子大覺金仙采擷來長短句云捲起珠簾看是誰家妃
子收拾金匱市中織綾名徧地桃又名急地綾漆冠並用桃式圍腰尙鵝黃
謂之腰上黃婦女便服不施衿紐束身短製謂之不制衿又謂防女貞束髮
垂腦謂之女真粧始於宮掖徧及國中

破遼後教坊新樂歌云滿宮梳罷女真粧望金仙朝朝暮暮童謠云喜則喜
得入手愁則愁不長久怯則怯我兩箇厮守怕則怕金甲神來厮鬪破遼歌
云榛蓬蓬茅茸茸外頭花艷裏頭空但看明年春正月裏頭走了主人翁正
月二月又三月走進無數王郎蟲裏頭空空守外頭血流紅王郎強且雄外
頭攻來裏頭通飛出無數小金龍殺盡王郎是奴功將軍不必彎長弓看取
金盆掠月宮玉服環抱玉腰中鐵箍箍翁翁送金娘歌云金娘金娘誰家
女皇帝是我兄皇帝是我弟皇帝是我娃皇帝是我爹皇后我姊妹皇后我

妯娌皇后我嫂嫂皇后我娣娣送娘送到那方去送娘送到那家裏那方不南又不西那家不娃又不妻那箇人兒黃面又黃鬚黃冠又黃衣那箇娘兒作大姬那箇娘兒作小姬今夜小姬哭明朝大姬啼那箇娘兒是大妃那箇娘兒是小妃大妃當捉犬小妃當捉雞金娘金娘十萬八千里

甲編所叙皆兩姓絕續之談作對鏡觀人無此壽爲傳信地天故存疑徒令觸緒生悲仰天痛哭耳老僧更何勞說法木居士書

燼餘錄甲編終

刊
行

燼餘錄乙編

城北遺民述

順德鄧 實校錄

先朝自建隆訖咸淳凡舉進士九十三科吳郡自景祐中范文正建學後文教漸盛然狀頭之選至淳熙八年黃由始繼者淳熙十一年衛涇咸淳元年阮登炳終宋之世得三人可謂難已故老相傳潮到唯亭出狀元亦有驗有不驗

重和元年戊戌七月盤門外程姓農人鋤地得古冢深入隧道百丈始見石室陳設古器百餘事室後石門三重不扁又一重似石非石似鐵非鐵扁不可啟闔城闕傳觀者萬衆郡守知爲孫堅墓亟遣僚封閉

郡各有志上之天子下爲時鑑先朝眞宗時詔脩圖經我郡羅處約實任之凡爲書六十卷神宗時朱長文續撰三卷建炎一炬僅有存者范文穆公因輯吳郡志未卒業而薨紹定間郡守李公壽明就未竟之本略加增續釐爲

五十卷其時文獻難徵且多忌諱匆次付雕實未詳備書出譁然趙公與愨再任郡守始就原書外續輯五十卷事未完以遷任去及三任吳郡知都人士猶以爲嫌尙未付梓適卽丐祠遂持稿去郡人章某先就兩志之遺作吳志類補十三卷亦爲携去訖今再經兵燹已刊之吳郡志無復見及趙章兩書更無從訪已

范志釐訂時有建炎死難男婦事節姓氏稿尺許文穆以真僞雜糅且不可文批擬別存李公增續時一未節取亦未另刊又文穆批留待編之原稿一百四十餘冊李公以僅資表隱無關地方掌故亦未補入書成後都人士等諸廢紙無欲收藏故存本特少見先祖筆乘

吳郡志崑山一邑事較備其時龔明之寓郡中皆所采摛文穆重其人因重其言悉編錄之明之著有中吳紀聞八卷齊東野語四卷野語甚秘以所載皆犯時禁文網太密時事無證三代當不如是見筆乘

季心池筆記云孫園在桃鳴西孫氏莊房在焉李侍郎殉國難族子茂苑年尙少誤爲皇孫被掠去後隨韋太后歸屢上封事請雪國恥忤旨削職遂之吳槁隱園中顏其室曰鍼氈座酒酣耳熱作普天同憤錄冀激昂忠義之氣因近誣讖將興天獄時茂苑已死其孫堯臣集金人亡國事作普天洩憤錄以求解流傳宮禁得官未就奉母載酒日徜徉於柳隄荷蕩之間鼎革後自經死私謚孝烈按普天同憤錄四卷都有姓名職位時日地址可証不能臆造茂苑雖激烈不失爲忠臣座中但祀孝烈何居

城陷年前慶雲里陳明叔家吉祥草梅園書帶草廬中帶草均長丈餘披拂及檐北兵至兩家多自經者太湖鼠千萬成羣登岸食稼不知自來亦一奇也

簾影詞人某氏女工詞曲爲諸社冠家富孤生又苛擇婿因是年二十尙未嫁也庚戌城陷被掠以病見遺爲軍卒所得鬻入青樓班頭利其艷慧不肯

輕脫遺黎慕其名者窘於貲乃爲嘉興李懶皮所贖懶皮不識一丁贅於李業米豆至是內家被毀室人病痲遂擁婦貲屋百口橋實簾影故居爲九姓軍官所鬻也簾影入門見瘞藏無恙秘不言久之大婦益悍懶皮益懶乃與對天要約發所藏四萬五千金歸懶皮自取三千金別嫁劉仲高劉亦名士逾年死李不一月大婦死別買姬妾十餘人氣焰益豪才命相尅有如是哉道君晚年得茯苓千枚於宮樹下皆成人形五官畢具大者六尺極小亦二尺許均具血澤方士謂天助飛升薦景靈宮寶籙官畢頒賜勳貴百餘枝與賜者爭相寵異北狩後宮親戚貴編管家奴軍妓外后妃等千三百人皇子等三十人肉袒於廟門外披羊裘及腹繫氈條於手二聖引入幔殿行牽羊禮宣敕肆赦二聖受爵服出有頃出鄮朱二后歸第已胡服出婦女千人賜禁近猶肉祖髻髯賜苓羣貴情景見普天同憤錄然鼎革時張平子墓中亦得成形茯苓數百未有所驗平子於漢初非命死葬衣冠於城北梅校理封

樹之詳見碑記

章申公有妻之喪殯於旃檀庵後有五畹園舊址漢張平子衣冠墓皆梅校理脩復者柳隄花鳴風物一新西南卽章氏膏腴地阡陌交通溪流縈帶廣七百畝諸公子顧而樂之廣闢池沼旁植桃李曲折凡十餘里仍桃鳴舊名又築走馬樓於五畹園西俯瞰園景歷歷在目暮春三月菜花油油黃金布地一望無垠西卽申公功德祠曲室洞房環列左右極幽雅之趣其後章子詠華遂藏嬌其中長曰碧桃工詩詞著有微波集次曰紅豆擅絲竹兀朮陷城時碧桃隨章子殉難紅豆被辱不能起火化於樓臺一炬中有婢春雪檢章子碧桃之骨歸葬於西崦山

模按章質夫樞密名棗諡莊簡封秦國公章惇曾諡莊敏封申國公此書所載皆質夫事凡作申公者皆誤

建炎庚戌兀朮南寇二月二十四日犯盤胥葑婁四門闔城居民麇集北城

土寨夜五漏兀朮破盤門入二十六日未明寨亦陷守將趙秉文僧雲逸死之黎明寇大至先驅兵士戮寨外次脅丁男歸獻金盡殺之次斬老婦嬰兒於東北園積薪焚屍兀朮宴諸酋於天半樓遂踞寨三月朔始出閭門去初三日諸軍凱旋寨中慶雲庵旃檀庵報恩寺楊柳樓臺張家祠劉家祠梅園章園孫園蔡莊以寇巢燬婦女二萬餘人以從寇籍蔡隆興倡議瘞河中男屍八萬五千餘女屍十一萬一千餘人暴露男屍六萬二千餘女屍二萬五千餘火化男女骨十五萬七千餘贖回營妓二千三百餘人周宣撫陷以通寇駢於市全家投池以殉池荷忽生碧血羣相驚異里人於蔡莊築庵祀之黃十二齡童衛母傷寇釘死臨頓橋門吳邑吏曹行謙以擊寇支解伶人呂巧以罵賊拔舌吳永年妻及姊擒酋投水雛妓朱素素碎盃自刎於甘節坊徐靈姐破兀朮首鬻割於天半樓張采姑掠入對山閣不屈墜樓死三女子從之失其姓劉士誠妻扼寇項入子城河死節錄虞圖南沼吳編朱三

官者周二娘之女故世家也宋末沒入官故事官妓歲選十人各給身資十千五年期滿歸原寮本官携去者再給二十千軍妓以勾欄妓輪值之歲各入值一月後多斂資給吏胥購代者是軍伍掠婦女誣爲盜眷官司錄罪孥及於良家婦之候理者固有宋第一批政二聖北狩後始革除鼎革後變本加法網勝人女似妓似眷得獨擅其利春秋佳日游船集虎邱桃鳴者幾成海市易姓之際二娘不受異類辱死於井三官得避朱氏舟名噪一時官司口知之欲擢去三官守母訓竟沈於桃鳴之小蠡湖亦奇女子哉

楊柳隄北舊有劉家祠萬竹圍環頗饒逸趣鼎革後有達官奉母携眷避甲主之患勝於門曰孤竹園倩一僧持香火以令甲惟娼優隸卒僧道尼丐不隸甲下也事漸洩全家披薙不數月又下搜禁僧尼同居之令密捕遽至全家沈於井達官亦自盡題其壁曰死本我分求忠孝之兼全恩大難酬愧從容以盡節皇天后土宜鑒此心妃子才人請予顯報口法入宮之日老僧暝

目之年怨氣未消露骨勿葬特不詳姓名爲憾

模按達官當是李堯臣先生妃子云云與普天洩憤記意相合詳見前卷
靖康之變宮闈不可復問頗疑宋初授受未若唐代失德不應有此觀官
妓軍妓之流弊亦大因果也元初甲主之害浮於官妓軍妓番僧演秘密
法先生當無罣礙矣

周子勉長洲人年二十四館同門家課其子妖歲取脩脯四十緡同門固富
家故倍於常人建炎已酉同門捐館舍子勉經紀其喪以及其家事勞怨不
辭無何同門之室年少不謹子勉藉辭堅引去庚戌春適館洞庭山脩脯歲
十二緡自若也兀朮陷城適免於禍以少年未婚之子得至豐絕美之遇守
正不阿宜免於死見先父見聞雜志

入闔門河而東循能仁寺章家庵河而北過石塘橋出齊門古皆稱桃花河
河西北皆桃陽地廣袤所至眩大雲鄉全境今大半爲菜圃章園桃李十存

一二梅園古樹幾難踪迹然游人好事仍此探春杜荀鶴有桃花河詩邦人皆能誦之

五晦園舊有靈芝石高七尺縱橫八九尺石面平坦四旁若無數靈芝大小相疊嵌空玲瓏不假人力洵爲奇品亂後尙存又有丈人峯高四丈今已折爲二其一頗似觀音象靜順道人依石結庵以祀之相傳兩石皆漢晉物梅校理又得石峯三高皆二丈餘名三老峯桃鵝中亦有石峯二高可二丈一名慶雲一名擎天柱又有西漢夏侯湛碑張平子墓碑云是五晦園舊物今尙環列於功德祠之北頑石有知應動麥秀黍離之感

蔡京用事後傾陷章氏申公次子縱被誣盜鑄御史案獄時里巷震驚至有遷避鄉僻者獄成文面編管罪及同懷政和間昭雪赦爲閣門官或勸用藥除之縱戲曰行且疏注云太師誤筆焉用除爲或亦調之曰注須奏聞莫再私注

朱勗寵任時官其六子八孫門第赫然子汝賢汝功並承宣使汝文及孫絺繹約絢緯綬並閣門舍人汝玃朝奉大夫直龍圖閣汝舟明州觀察使汝明榮州刺史孫綽紳並閣門祇候置田三十萬畝分屬八孫兩幼子遠建莊房於虎邱三里一莊凡十所今其地稱幾房莊

范文正微時讀書蕭寺日煑粥一盂四分之早晚取二分斷黃齏數莖啖之三年如一日偶穴地得金一穴掩之曰非我物也貴盛後吳中大飢乃緘書當事發之得金十數萬充賑全活無算見世父考亭公簡記

慶雲亭在東荷池東亭額出岳少保手筆兀朮之難梅章園林鞠爲茂草亭以偏東獨存地接慶雲里東皆農田菜花黃時士女如雲文丞相微時道出平江嘗題亭壁有一片黃雲萬頃田江南父老慶豐年之句張少保尙隨某軍府使令適亦過此兩賢相見自此始聿然都尉仰惟先德築庵於其間並奉丞相少保象爲惡少所控且誣誘匿梅氏女遂斃於獄庵象亦毀

兀朮之禍城鄉內外獨遺洞庭山一區胡騎未到真如世外桃源人人相幸
紹興二年冬太湖忽爲冰合運載不通適又年饑山無積粟冰合三十五日
至以樹皮磨粉皮箱煎汁死者十五天數難逃如是

吳雲公雅善詩詞居城東之臨頓里著有香天雪海集傳誦一時靖康國難
後披髮佯狂更號中興野人厭棄城市時往來於吳江李山民家李卽忠愍
公諱若水之姪避寇來吳就館吳江與雲公爲僚壻且同爲歲寒社詩友也
山民嘗題洞仙歌於吳江橋亭云飛梁壓水虹影澄清曉橘里漁村半烟草
今來古往物是人非天地裏惟有江山不老雨中風帽四海誰知我一劍橫
空幾番過案玉龍嘶未斷月冷波寒歸去也林屋洞天無鑠認雲屏烟障是
吾廬任滿地蒼苔年年不掃雲公和以念奴嬌云炎精中否歎人才委靡都
無英物賊騎長驅三犯闕誰作長城堅壁萬國奔騰兩宮幽陷此恨何時雪
草廬三顧豈無高臥賢傑天心眷我神州我皇神武踵曾孫發河岳英靈俱

效順狂賊會須灰滅翠羽南巡叩闈無語徒有衝冠髮孤忠耿耿劍鋒冷浸
秋月兩詞並刊集中

雲逸和尚惠遠僧裔住持旃檀庵三十年庵介梅章兩家別業雲逸能詩結
吟梅社以延客社中梅子采南章子詠華效流觴曲水故事廣其庵前雙魚
放生池以通五晦別業之雙荷花池桃鴈別業之千尺潭北兵陷城雲逸猶
駕瓜皮艇容與楊柳隄畔守堞兵散招之使渡雲逸奮起令結寨守兩日忽
慨然曰母苦衆生也自投雙魚池死兵遂潰然無倖生者

章園藥闌之西築曠觀臺鋪地皆五色石走馬樓上楹帖以翡翠琢成畫棟
朝飛南浦雲珠簾暮捲西山雨十四字皆費千金亂後於瓦礫中得一雲字
完好無恙

顧淡雲別號夢梁詞人著有夢梁集和李山民題吳江橋亭一闋倚水調歌
頭云平生太湖上短棹幾經過如今重到何事愁與水雲多擬把匣中長劍

換取扁舟一葉歸去老漁蓑銀艾非吾事邱壑已蹉跎膾新鱸斟美酒起悲歌太平生長豈謂今日識兵戈欲瀉三江雪浪淨胡塵千里不用挽天河回首望霄漢雙淚墮清波淡雲居靈芝坊亦歲寒社友

兀朮陷蘇時荼毒生靈歷古未有小兒十歲以下男子四十以上及四十以下不任肩負與識字者婦女三十以上及三十以下向未裹足與已生產者盡戮無遺尤奇者凡有書籍之民居有簿記之店肆必盡火其屋盡殺其人雖婦穉不遺去時以一衾絡一女一兒使兩男擔之大約裹脅以去者十萬人城中僅留有病婦女四千一百餘人於南寨使遣黎邵登轍等四人守護之留一萬六千七百餘人於北寨亦有病婦女使蔡隆興等十人守護之前夕封邵爲千戶蔡爲萬戶并給金帛有差所據合城屋宇中男子病不能行者盡殺之婦女或驅入寨或亦殺之謂之洗城

裨將趙秉中者蠡里人素業組織斂力過人兀朮陷城時隨衆下城擁至桃

花陽故與雲逸和尚相諭相約結寨以守秉中勇氣百倍衆皆聽命不炊許
金兵大集飛矢如蝗秉中發霹靂弩相禦彈石橫飛百發百中金兵稍却雲
逸有徒習奇門術遂布六丁六甲之陣迷霧四塞敵倒植裸婦以厭勝秉中
猝遇流矢投長甯池死死輒爲厲過其地者每迷惘入水中里人環池築牆
鐫石額

四長甯是池本名讓漁爲桃陽別墅十二池之一桃陽別墅有池名小蠡湖
者中築石舫亂後僅存漁艇妓船依爲東道好事者爲供范蠡西子之位舟
中人朔望頂禮增築兩椽題額者爲是野鴛比翼之所書野舫兩字以嘲之
不半年基址悉圯說者謂有紈袴子曾逼朱氏女於此女固少寡也死於水
他日紈袴復至遂遭陸沉之厄云

方家閣在烏鵲橋方謙庵先生故居先生諱通父深究天人之學著有諸經
粹說二十卷讀史平論三十卷非子十卷鄉里典型十卷經世大本錄四卷

謙庵文集八卷家有藏書閣五楹環閣水池環池竹木日著書其中寒士無書可讀者任聽入閣借看質疑問難不少厭倦有側讀斜揭者教以端坐正書輕揭平覆謂卽敬之一端子二人督課甚嚴不使應試年八十二卒卒之日寒士環而哭者充其廬私謚惠達先生見世父考亭公札記

朱劬家本虎邱用事後構屋盤門內名淶水園中有雙節堂御容殿御賜閣迷香樓九曲橋十八曲水八寶亭又毀閭門內北倉爲養植園栽種盆花每一花事必供設數千本游人給司閽錢二十文任入游觀婦穉不費分文故游女獨多園中多關歧路往往迷不得出穢聲四布衆怒以目事敗後承旨檢產者乘未辨色時率役三百人逕造其家全家不及衣履盡驅門外監守之監役相與挪揄甚至求死不得檢估兩日已復驅入監押之人心大快養植園花木盡斫爲薪僅存二丈大石六七枝偃仰柳毅橋畔至今猶存北兵之禍殺戮無人理甚至縛童穉於高竿射中其竅者賭羊酒亂後檢骨十餘

萬葬於桃鳴西北周書橋題墓碑曰萬忠鼎革後編二十家爲甲以北人爲甲主衣服飲食惟所欲童男少女惟所命自盡者又不知凡幾金芸樓室人周氏花燭之夕甲主踞之周以熨斗破其腦亦自經死芸樓懼禍縊其旁越三年五月五日聯合省郡同殲甲主後里人收其骨葬於萬忠墓右表以石曰義夫節婦墓

大慈寺在東北園晉高士戴逵故居逵子顥捨宅之半爲乾元寺其半歸陸司勳唐咸通中陸亦捨爲北禪寺祥符中兼有乾元之地大起殿宇敕賜今名旁闢池亭納皮陸詩石四圍栽樹花木一時稱盛游人過章園梅園者必一至其地因稱爲東北園建炎之難爲兀朮偏將所據東城老穉盡數就戮於此積薪焚屍寺亦俱燼

東城有苦瓜大王者素暴橫屢懲有司稍稍斂迹兀朮陷城時苦瓜集黨三十人語之曰我輩殺身成仁效忠報國在此一時遂執羊酒迎師誤認金酋

史大師爲四太子環而殺之遂爲金兵所醢三十人無一免苦瓜王姓名卦業瓜果其黨曰陳七李經陸大胖餘不著稱

申公嘗延盧孝達先生革教其子設壇坫於桃陽別墅先生守康節邵子之緒諸公子倜儻風流不率其教席不暇暖而去僅正道書院一額傳爲先生所作見考亭公札記

世稱燐火爲鬼亦云人骨所化章氏別業西北亂後皆叢葬地風瀟雨晦之夕常見燐火叢叢出沒於菱池芡池之畔有施氏子夏夜操舟釣於楊柳隄邊擊楫作歌忽有人和之曰綠楊隄畔白楊樹便是儂家藁葬處四顧無人惟見燐火明滅而已

崇甯大觀間衣服相尙短窄宣靖之際內及閨閣外及鄉僻上衣偁窄稱其體襞開四縫而扣之曰密四門小衣偁管開縫而扣之曰便襠亦曰任人便髮髻大而扁曰盤福龍亦曰便眠覺紹興以後此風稍息景定以後復若宣

靖讖者知爲服妖而不能禁豈兩次被兵凡被裹脅者悉令服此有因寬衣大袖而死者

時至末造兵非衛民擾民耳官非治民厲民耳建炎之難惟浙宣撫使周望倚諸將爲腹心惟言是聽郭仲威魯鈺兩軍屯城內巨師古軍屯吳江李闓羅軍屯常熟悉歸節制軍惟騷擾毫不設備二月金犯秀州巨李諸軍潰二十三日金兵直抵城下周望先遁郭魯兩軍縱火飽掠而去二十四五日義民固守二十六城陷三月朔金兵退初二日張俊軍來自崑山初三日郭魯巨李相率回軍男婦遷避鄉邑者悉被其掠城中所存男子十六人以從逆斬病婦二萬餘人並沒充軍妓且勒索瘞藏不堪淫刑以死者復數千人獨陳思恭一軍向屯湖州烏墩鎮至是率師出太湖截擊金軍大亂斬殺甚衆初五日奏凱回城周望惡其專功匿不以聞

德祐元年四月北軍抵楓橋我軍官李全卜人尤興投北已久至是持書招

降郡守潛說友已遁郡倖胡玉林鏜備犒出降翌日張少傅世傑提軍入城北軍遂退十二月張軍以援浙去北軍又大至都統王邦傑通判王矩之降敵初八日北軍揭榜安民云大兵入城時不殺一人不掠一物居民有抗心自盡者殺一家有一家同盡者屠一巷遂相戒弗死戶設香燈明日祁寒風雪先之匿避屋頭巷脚者無不瑟縮歸戶北軍屯六門外並不入城人人感戴初十黎明六門並進散軍踞小戶北軍踞中戶軍官踞大戶所踞之人卽爲一家之主人財服物悉歸所得居者方戀寒衾來者已先入室冤慘荼毒更甚建炎乃知不殺不掠作如此解

模按不殺不掠千古如此豈獨德祐

鼎革後城鄉徧設甲主孳人妻女有志者皆自裁不幸有母姑兒女牽繫欲求兩全者逃避無所仰俯無資竟出下策爲舟妓以舟人不設甲主舟妓向不辱身也虎邱桃鳴之間遂多名妓皆良家子耳馮玉媛爲某宦聘媳李巧

巧爲某學士女曹大娘爲某縣令妻沈二娘爲某牧伯寡妾沈德齡著小蠹湖水調歌虎邱游春詞詳記之於苦海中尋樂趣我惡其忍

靜順道人宋公主也適駙馬戴氏臨安再陷陞避吳興爲亂兵所掠卒歸軍官張聿然卽少保族子鼎革後偕隱平江築采香庵於東荷池畔靜順結茅於西荷池畔削髮爲尼能畫蘭竹嗣有梅氏姊妹爲達魯百花所偪毀容依之築庵於寄茅故址清脩梵行未一年同時化去瘞於庵西鴛鴦亭址

模按南渡後無公主下降適戴者是縣主

西北邊患由夏而遼而金二百年來無虛日立邊功者申公爲最著渭州之捷西夏以定因名桃鳴別墅之西軒曰清夏每過夏雨暑氣一清雙池荷花香風習習乘涼者必登此軒亂後軒毀壁間象石巍然卓立鼎革之際忽碑象中流淚如雨三日不止里人詫然驚異不旬日遂聞崖山之變

楮星海居胥門中年喪偶遺雛尙幼僱婦調護德祐北兵入城主其家者欲

汚婦堅拒兵執楮勸之云鄰宦皆如是何苦累我婦云人禽關頭所爭祇此寧死不辱楮畏死哀婦卒不從兵乃釋楮而殺婦婦華短三之妻也鄰宦者已故節度某公子居第爲軍官索洛所踞媳女從索二妾不從索繫公子痛鞭之一妾從而止一妾斬以徇被斬者畢氏名楚香

曹碩父居太乙宮前事後母如母三弟皆不弟且耗其家碩父弗與較且屢助之久之弟皆感化析產時碩父僅得什之二又爲諸弟耗其半至是以所存者勻分其弟弟不忍受遂爲公家產同居合餐者五世郡伯旌其門曰孝悌建炎之難其孫曾輩三十人先避去無一與其難

章莊敏申國公竊章莊敏申國公惇均系出建安生同族死同諡性情獨異竊字質甫家城北買田五百畝任人種植惟阡陌間隨流屈曲徧栽桃柳當春花發徒步自娛世稱北園惇字子厚構園滄浪亭址窮極華麗南卽在園外遂有南北章之稱子厚告歸焚黃冠蓋雲集游宴無虛日質甫先生十年

一歸恂恂如寒素西夏功成後屢引退不許及子厚再議開邊奏牘書函力阻不已竟與子厚絕

杜芳洲崑山南翔人贅城東顧氏夫婦工詩宣和間結歲寒吟社與吟梅詩浪鼎足著有聯珠吟草多閨房倡和之作建炎庚戌二月二十三日對縊死家人急爲殮瘞甫就緒城陷遺絕命詞三首僅傳結句云同驂鸞鶴冲霄去肯向塵寰再問津芳洲名載

乙編所叙皆吳中事足補吳郡志中吳紀聞兩書之闕惜後裔遷居書未付梓盧王二公脩志時竟未見及木居士書

燼餘錄乙編終

跋

是書甲編紀宋初宋末事乙編紀吳中事所紀亡國之民遺聞軼事零篇賸句讀之無非傷心之作蒐桑海之舊聞作人間之實錄淒涼法曲隔世如聞感不絕於余心矣錄中有云北兵之禍殺戮無人理鼎革後編二十家爲甲以北人爲甲主衣服飲食惟所欲童男少女惟所命自盡者不知凡幾可見金人之殘酷其妄分色目以畛域吾族其族類之見固未嘗一日忘也中間有李模按語頗具特識是錄以當時投忌秘藏於謨流傳至今卒未付梓今據嘉惠堂鈔本以刊行云丙午冬十月雞鳴風雨樓主人記

刑

行

光緒三十二年十月十二日首版
光緒三十二年十月十二日發行

(國粹叢書燼餘錄)

定價洋壹角伍分

著者 城北遺民

印行者 國學保存會
上海鐵馬路北愛而近路

發行所 國粹學報館
上海四馬路東惠福里

0

601572